

古田縣志卷之二十八

文苑傳

昔范蔚宗作後漢書爲文苑列傳後有作者率沿其例不能易也  
昌黎韓子稱古之善以文鳴者或聲大而遠或聲清以浮或節數  
以急或辭淫以哀或和其聲而使鳴國家之盛或窮其心思據其  
悲憤而使自鳴其不平識者於此讀其文論其世卽以知其人焉  
古邑文學自余拾遺開其先張翠屏學士及秋霞蓋萬諸先生踵  
之斯文精粹其在斯乎纂文苑傳

五代

余瓘字岷美一名賜仕南唐爲左拾遺善唐律後家將樂著有拾

古田縣志

卷之二十八

文苑傳

遺集二卷季子仁椿仕員外郎歷永貞令嘗捐田建學以訓鄉  
族子弟

宋

范得仁元祐間官龍圖閣學士富吟詠著有范學士集

李岩起字應求號休菴乾道間中特科才高好學爲時輩所推初  
尉政和調監臨安西酒庫遷池州總幹乞致仕遂監安南嶽廟  
丞相周必大甚優遇之

余發林字希董咸淳七年進士授崇安尉博學有雋才爲文操筆  
立就聲稱盛於江淞及卒門人哀其文爲愛梅集

余湜少俊逸年十一能詩其送龍池廖先生開講沙詩場云沙場

諸子弟少小盡晞顏迎我五經笥歸來七島山朝遊松子洞暮宿惠人灣講罷西風裏扁舟早送還後登祥符間進士嘗賦落花詩有西母已回金殿冷綠珠一墜玉樓空之句時人稱之元

陳亦言字汝納父瓊至正間爲晉江鹽場官因家焉亦言嗜學工詩不樂士進所與遊者蕭子玉趙應嘉輩十餘人皆一時名士著有潛齋集

陳宏官華亭同知知吳江州事著作詳載葉氏菴竹堂書目有易童子問及易象發揮等書

明

### 古田縣志

卷之二八

文苑傳

二

張以甯字志道父一清元福建江西行省參知政事以甯年八歲或訟其伯父於縣繫獄以甯詣縣伸理尹異之命賦琴堂詩立就伯父得釋以甯用是知名泰定中以春秋舉進士由菑巖判官進六合尹坐事免官滯留江淮者十年順帝徵爲國子助教累至翰林侍讀學士知制誥在朝宿儒虞集歐陽元揭傒斯黃潛之屬相繼物故以甯有俊才博學強記擅名於時人稱小張學士明師取元都與危素等皆赴京奏對稱旨復授侍讀學士特被寵遇帝嘗登鍾山以甯與朱升秦裕伯等扈從擁翠亭給筆札賦詩洪武二年秋奉使安南封其三子陳日燿爲國王御製詩一章遣之甫抵境而日燿卒國人乞以印詔授其世子以甯

不聽留居洱江上諭世子告哀於朝且請襲爵既得命俟使者  
林唐臣至然後入境將事事竣教世子服三年喪令其國人效  
中國行頓首稽首禮天子聞而嘉之賜璽書比諸陸賈馬援再  
賜御製詩八章及還道卒詔有司歸其柩所在致祭給三歲祿  
卹其家以甯爲人清潔不營財產奉使往還襍被外無他物本  
以春秋致高第故所學尤專春秋多所自得譔胡傳辨疑最辨  
博惟春王正月考未就寓安南踰半歲始卒業元故官來京者  
素及以甯名尤重素長於史以甯長於經素宋元史稿俱失傳  
而以甯春秋學遂行宋濂嘗序其集以爲豐腴雄峭一代奇作  
著有春秋論斷二卷春王正月考一卷淮南集一卷翠屏集四

### 古田縣志

卷之二八

文苑傳

三

#### 卷南歸紀行一卷祀鄉賢

陳榕字希夷性聰敏過目成誦兒時應口屬對有鶴頂金箱帶羊  
脂玉碾杯之句及長益豪放不羈卒年二十有四子炬燧燁煜  
炬煜以明經舉官蒲圻知縣炬以茂才薦授新淦知縣終刑部  
員外郎煜子隆本名挺歷任南雄保昌訓導

郭文涓字穉源號東臯以貢領應天鄉薦授保甯同知迎父之任  
五載蜀中欽其孝行清節有頌聲旋乞歸隆慶改元詔進朝列  
大夫性恬淡高曠工詩文詩選入晉安風雅廉訪魏文煇耆儒  
丁朝立爲序以行世宗伯林嫌見其集嘆曰古田前有翠屏後  
有東臯以詩贈之林世璧才士也客有問海內誰可與談詩者

世璧瞠視良久曰獨郭穉源耳卒年八十大僕卿林煇銘其墓  
著有享帚集六卷

高鐘字鯨音號震野以歲薦授壽昌訓導性和厚博學善屬文在  
官立課程恤寒峻士林感之有李氏貞女年十六守節鐘輒優  
恤之著有評史集

黃中字印坤延平教授素端謹工詩嘗立紫陽詩社與諸文士以  
詩學相砥礪所作多選入晉安風雅著有江上草

丁朝立字劍川工詩善書自號養恬居士曾與修邑乘著有養恬  
居士集

周世椿字德懋號秀宇由諸生入監任光祿寺監事奉委往昌平

### 古田縣志

卷之二八

文苑傳

四

州頒給軍糧尋卒有詩名著有嵩陽集

鄭鐸字子警自號黃花主人與林春秀爲詩友著有樵林詩選  
魏瑛字以肅性喜飲少飲輒醉醉則擊唾壺而歌結茅五華山中  
以嘯詠自樂終身不復出著有醉墨集

魏煇字誠甫以選貢倅壽州終唐府審理長不滿五尺而氣雄萬  
夫有俊才嗜酒能詩善畫不遇卒詩文散佚張極爲作傳輯其  
遺稿

林春秀字子質明末諸生隱居不出性嗜酒家貧不能給鄭鐸嘗  
儲酒飲之終身一布帽嘗言吾自分田野中人也工詩文謝在  
杭嘗序其集云數奇流落白首一經操劍悲歌氣填胸臆其詩

學博才雄氣宏理約操心深而寄興遠風度飭而神情恬至於歌行渾泓蹀躞步伍不亂尤得初唐之軌徐惟和贈以詩曰何人能識醉中趣獨我許留身後名蓋實錄云著有枕麴集

陳芹字朝采喜著述以布衣終著有華麓山堂漫稿

林灑字元盛號古侗御史英六世孫乙酉鄉試己入選因卷遺於地落副車後以歲薦授昌化令有循聲素工制舉業嘗云吾文如水墨不入時眼自是可傳之物著有詞叢彙選八卷

郭岱字震川文涓孫以貢授海澄訓導歷遷建陽教諭儋州學正著有彙古萃玉集二十六卷林灑爲之序仲弟嵩諸生結西郊詩社與張極齊名余文龍深器重之卒銘其墓叔弟徽爲濟甯

### 古田縣志

卷之二八

文苑傳

五

倅亦能詩李弟嶷以貢授邵武訓導遷德化教諭建學宮修文廟士林德之卒於官祀名宦

趙應際字仲達諸生性豪爽與余文龍姚萬里友善同在桂花齋讀書二十餘年以詩文著名著有約齊集

黃文奎字聚五由萬歷壬午科舉人授沙縣訓導擢興業令調湖南桂東知縣性恬淡富吟詠與巡撫袁際陽相友善有次韻袁中丞乞休詩五百餘首稿多散佚

清

黃龍字臥菴初名農字逢年爲諸生時喜談兵以詩文獻藩王王器之與語謂龍才兼文武薦之甲甲冬授副將乙酉秋黃道周

督師勤王檄龍統兵赴浙隨召還鎮建甯後隨清師北上授京秩出守蒼梧遷四川永甯道擢江西按察使工詩著有臥菴集二卷龔鼎孳序之以行世

林喬材字世臣諸生邑西南有五華山秋時明霞爍爍可愛喬材築宅傍之因自號秋霞子與鄧述黃龍友善述尙氣節龍急功名喬材獨嗜著述述以憂憤終龍從清師北上後出守蒼梧貽書招之強爲一往旋倦遊歸性耽於書工詩古文自經史以至天官職方兵農醫卜之書不惜移薪米貲以購之其自爲傳嘗欲散髮於華山之巔縱觀烟雲變態以終其身云著有四書集說禹貢注解一卷秋霞子集四卷

## 古田縣志

卷之二八

文苑傳

六

藍鳳儀字羽徵工詩善草書與黃龍友善龍既貴以書招之入京楊司馬延爲經師日飲醕酒見人輒嫚罵於龍尤甚遂遘痰疾疾革語龍曰我生平所爲詩貧不能梓爾爲我梓之我父好客至鬻祀田爾爲我贖之旋卒

陳山斗字韓伯以貢任茂名令改順昌教諭富著述著有玉屑集及桂園彙草各二卷

郭如璧字書府由歲貢任延平教授嘗結六友社以文學相砥礪六友者如璧及同邑宋聚奎鍾鏞趙復昌黃道光趙時昇也著有問青集弟如奎亦以歲貢任甯洋教諭與齊名著有疑舫小草

林首達字上而諸生性孝友甲寅耿逆之變父常登以不污僞命繫獄首達詣獄請代事詳常登傳中常登有子五人田千畝昆季求析產首達與叔弟首運各取其瘠者七十畝以自給餘悉以讓其兄弟年四十不與鄉試卜居金井額其軒曰麴阮杜門嘯詠每當酒酣耳熱輒伸紙疾書不假修飾而多警語著有鳴

籟集二卷

江南俊字思皇以歲貢任甯化訓導性雅潔課士有法及歸貧困不能自存南俊與弟南紀工詩文邑人林喬材亟稱之有江氏二難之目

施松齡字青侯以拔貢肄業國子監六試皆冠軍壬午登賢書授

古田縣志

卷之二八

文苑傳

七

將樂教諭調諸羅卒於官初在京時名噪甚薦紳某欲羅致門下謝不往謂人曰士當自置身青雲若效奔競取青紫吾不爲也撫軍張公知其才延訪以前史疑事並命校正鰲峯新鐫書籍以詳慎精密聞在官以獎勵名教爲己任士感其惠松齡貌豐偉而性耿介善飲精手談尤工書法所爲詩古文詞綽有大家風力著有不是集十卷

余圭字告公文龍孫官光祿寺署正性雅適喜吟詠著有挾仙樓集二十卷

林日詔字子召諸生素豪俠不治生產博聞強識耽於著述每彙集昔賢言行以自砥礪著有達書二卷玉田風雅四卷及四書

集解古田誌餘臥梅集江上吟各若干卷

李斌字青如諸生善聲詩與余祥智余元溥黃應虬李生春李其壽余常吉李捷英余琳余升吉李光瓊余希禹輩結詩社日相倡和極一時之盛著有借雲樓詩集及閩詩拔尤藍田風雅各若干卷

朱蓋字彥伯諸生善屬文尤長於詩與林日詔陳懋威林總護丁鎬丁先聘同師事林喬材俱以詩名著有剡山園草及臥一樓集

林荃字元草諸生其母鄧氏能詩鄧逃妹也荃八九歲母卽教以聲律及長豪放不羈學益進其舅鄧逃與高國定林喬材朱蓋

古田縣志

卷之二八

文苑傳

八

林日詔郭如璧結七子詩社荃與焉著有放鶴樓詩集

鄭昌選字旭泰諸生藏書數千卷皆成誦有造門問字者則曰汝輩何不讀書也或故舉古書軼事錯亂其說以試之則條舉縷晰無毫厘差聽者駭服詩文尤奇有千秋長恨歌迴文千字縱橫得百絕句陳清端公瓚亟賞之著有半髡集

余天民字作求諸生有氣節甲寅耿變欲脅以偽職遁去入湖廣戎幕居三載不遇歸築浴梅書室貯書數千卷以自娛著有浴梅小草及楚遊集各三卷

莊啓照字東曉諸生自號棠園居士家故貧其處世一宗老子守雌言遇事輒退讓精通經史於通鑑綱目春秋繁露皆有淺注



其所作雁陣魚陣諸律尤膾炙一時著有棠園居士集

陸鴻字儀可諸生博學洽聞爲文一日可十餘藝皆有奇氣詩亦飄然出塵著有棠園詩草子萬寶不謹細行亦能詩每得句疾書旁若無人翁文達謂其有古俠客風

丁錡字象鼎諸生少以文見奇於范忠貞公爲經師五十年門人最著者林鳳岐林梓林杖卓謁黃承祐黃金輩皆有文名著有四書講義摘要若干卷

陳琮字季璧超祚子諸生湛深經術爲文卓然成大家讀書白雲寺中嘯詠自得幾二十年學者稱爲桃溪先生當時言詩文者無不宗之同時陳蕙芳陳潢高廷燿姜奉世陳紹馨翁維琰皆

## 古田縣志

卷之二八

文苑傳

九

與友善著有詔書堂詩文集三卷白雲寺志一卷

盧文達字姬士朝鼎子恩貢素積學主敬業書院講席一宗白鹿洞及籍溪課士法舉孝廉方正入京試司成第一其所爲文皆足羽翼聖賢經傳學者宗之著有禮記捷解

余登年字書升少孤苦勤於學癸卯魁禮經素莊重講學會城盛暑必著衣冠三山學者皆敬重之其爲文深醇雅健一如其人著有秀坐文集二卷

孫諤字和公諸生博極羣書於或問語類尤推勘入微講學四十餘年邑名士多出其門素端謹安貧樂道不敢干以私著有

## 四書釋八卷

黃承祐字允吉善屬文癸巳恩科舉人任歸化教諭卒於官著有  
翠和集

魏夢燭字耿齊乾隆丁巳進士少嗜學家貧每向鄰人借書讀之  
如期卽還人稱其信庚子舉於鄉屢蹶公車有相者曰君有貴  
星無官星夢燭笑應之曰子不能必我之官豈能必我之文耶  
勵志如初果登第著有洞雲草一卷

翁文達字兼卿丁巳聯捷進士乞假歸益肆力於經史子集文學  
歐曾詩宗陶柳移寓玉灘老屋數椽著述盈篋嘗作讀書八詠  
皆自道其所得一時傳誦幾於紙貴洛陽著有桃湖詩文集二  
卷古今名臣錄十卷姓氏瑤林四卷

### 古田縣志

卷之二八

文苑傳

十

鄭植字于岸乾隆壬戌聯捷進士貌魁偉有雋才當事延主鰲峯  
講席旋應粵東聘主講粵秀書院七年粵人士尊信之丁外艱  
旋卒著有十三經辨疑廿一史辨疑月坡集各若干卷植聞見  
博洽於詩尤工管輯本朝諸家詩爲詩略數十卷藏於家  
金學奇字雲溪諸生母袁氏守節養孤教以義方學奇益勵志飭  
行言動有法學亦日進當事訪舉優行以學奇薦時稱得人著  
有木蘭集三卷庸菴文集一卷

陳層巒字登山諸生家貧力學詩有唐人風味著有聽月集

何夢白字玉澄諸生善病家復貧閉門靜養有得宿恙漸消其詩  
文獨闢町畦峭然壁立與同邑卓於阡李士宏陳滌葉標元友

善結凌雲社相切磋著有月湖集

余瓊字則能諸生文龍曾孫十歲能文及長尤工於詩性剛正不狗俗好時人重之卒年七十有六

林國樑字樹昂號洞樵乾隆丙辰恩科舉人官大冶知縣旋乞休歸嘗纂修邑乘以勤敏稱乙卯重赴鹿鳴恩宴卒年八十七國樑性謹厚有古君子風工詩善書著有未焚草及雙翠山房集林爲翰字瀛洲一字鈞雪雍正乙卯舉人與林咸吉林國樑孫正盛丁繼祖輩續修邑乘積學工詩著有種菜山房集

徐作梅字和羹以五經中式乾隆丁卯舉人授國子監學錄七試禮闈屢薦皆不售有文名遺稿多散佚

## 古田縣志

卷之二八

文苑傳

十一

丁繼祖字少維號贅巖乾隆間歲貢嘗與修邑乘善屬文尤工於詩著有山居集

姚人鸞字敦仁號丹巖乾隆間歲貢好吟詠著有畫中集

楊文嵩字伯宗號漪園乾隆庚寅副貢能詩著有漪園集

張星象字蓋萬後易名畢吾幼穎異有奇志讀書不喜爲帖括之學竊取馬班范三史讀之喜甚嘗暑月讀史兩脚入大甕中避蟲一夕讀有得忽踏甕起甕破足傷而讀不輟嘗夢見太史公語人曰吾見史遷矣頎而長逸而多姿鬚髯盡白人皆笑之時有張癡之目暇則溯溪而上觀其奔濤澎湃鬱勃拗怒與夫迴旋繚邈而紆徐也移時乃歸歸而以所得爲文以示人人又笑

之星象嘆曰吾文不得一知者天也悉投諸火焚焉後聞閩龔海峯爲古文宗匠因以文質之海峯一見驚嘆曰子之文真古文也排宕如永叔莽兀如昌黎惜吾師朱梅崖先生不及見也遂延爲上客已而星象以擬昌黎行難文見賞於督學朱文正公珪補弟子員旋延入幕海峰入賀得士由是星象古文名益著會鄉試漳郡生有入闈未錄者二十餘人人挾百餘金浼星象人請請可得三千餘金星象笑而却之未幾文正將入朝訓以宜古尤必宜今星象對曰得一知已可以無憾及送文正歸星象偃偃若有失一日忽發狂投江死年三十教諭陳金城儀部余廷珪皆爲之傳著有蓋萬文鈔編入國史館文苑

## 古田縣志

卷之二八

文苑傳

十一

陳惠若附貢學問淹博家居設絳爲經師數十年邑知名士如禮部主事余廷珪其弟附貢余廷璣舉人黃召棠皆出其門

余廷珪字琢山嘉慶己巳成進士內閣中書禮部主事歷充國史館校錄文淵閣檢閱學問淹博所爲詩文典雅華麗性清介不喜奔競在都供職公暇手不釋卷至老猶勤鈔寫名噪都下沒後數十年同鄉有入都者聞閣員談次尙有余卓卓之稱同年郭大理尙先慕其學行爲莫逆交巡撫劉次白聘主延平書院講席時學風丕振道光間與郭肇綸翁喆諸先達纂修邑乘稿本完未付梓

丁得輿字民載號石樓乾隆中寅舉人授永安教諭旋乞歸其詩

文樸茂溫雅有名於時著有石樓臥遊集

翁茂林字培青號竹窗廩生有文名善書瘦削不入時眼孫果亭  
觀察獨賞之著有竹窗集

郭肇綸字萬青號四峯嘉慶甲子舉人所爲詩文簡鍊有氣力與  
余廷珪齊名時人稱郭鍊余豔著有黃江客草依雲樓集

翁喆字侗初號碧山諸生茂林子學有根柢爲詩古文清而腴余  
廷珪稱其文堪華國遇不庇身尤工畫蘭著有擊缶吟烏麓草  
停雲初草續草涵碧樓偶存木蓮書屋偶存文集事詞撫聞略  
八十卷弟弼諸生亦能詩著有憇雲山館詩集一卷丁得輿跋  
其集有只今留得詩篇在奇妬天工奈爾何之句

## 古田縣志

卷之二八

文苑傳

十三

陳國政字觀南號荷峯嘉慶戊午舉人工詩著有醉癯吟

張斌丹字心蓬號赤城嘉慶癸酉舉人七試禮闈五薦終不售與  
林調梅蔣鳴珂友善善屬文工書詩亦清新出塵爲經師十餘  
年誘掖後進甚衆嘗戲作坐館文以解嘲旋以挑選署永安教  
諭補大田訓導卒於官遺稿皆散失

林調梅字鷲卿以拔貢登戊子賢書歷任光澤清流教諭積學工  
詩文書法秀勁著有蕉夢小牕詩文集若干卷

鄭其忠字恕齋道光丁酉舉人博極羣書言動必以禮爲諸生時  
沈學使維鏞稱其湛深經術拔置高等後登賢書不慕仕進閉  
戶著書與生徒講德考業所造就多顯達年七十三召生徒謂

之曰吾將不久於人世月之某日乃吾永訣時也屆期果無疾而終著作多散失今僅存魯論鄉黨考一卷

曾光斗字星齋原名建斗咸豐壬子成進士選庶常改刑部員外郎林剛愍公文察延入幕襄理軍務克復斗六城以知府用賞花翎光緒間以船政告成在事出力以道員陞用當路稔其學行延主講鰲峯者十餘年所造就人才甚衆岑襄勤公毓英撫閩時聘入幕使主章奏事無大小無不咨之光斗廉介有守博學能文少居會城與陳承裘劉齊銜沈葆楨相友善文名噪一時丁酉重赴鹿鳴恩宴士類榮之

徐連中字受之壬子副貢家貧授徒自給素績學工爲古文詞渾

## 古田縣志

卷之二八

文苑傳

十四

雄沈厚士林重之嘗以孟子閑先聖之道擬改亞聖諡號爲閑聖博舉經典爲文千餘言籲請於徐中丞宗幹章學使鑿雖議格不行猶以博通典籍尊聖情深褒之著有讀書一得四卷

丁珙字璧峯恩貢就職訓導性謹厚品學兼優善屬文操筆立就設帳授徒培植甚衆邑之縉紳名宿多出其門翁廷玉林炳先其尤著也

葉晨暉號升初同治壬戌恩科舉人大挑二等授漳平縣學教諭初蒞任卽將褫革庠生詳請開復應報節孝詳請旌表士林感頌爲立長生祿位以祀時與諸生講論經學儒風丕振生平著有經解行世

翁廷士字蘊石詩人碧山之胞姪也清同治庚午舉人大挑知縣  
著有蠹殘詩稿一卷侯官廖鳴鏘序其集

鄭惕之字乾初歲貢生博通書籍善屬文設絳授徒門業極盛所  
撰各體文藝風雅可人惜其家遺稿散失弟順之字復初諸生  
文亦古奧

余澤先字捷卿歲貢生任建甯府學教授工獼祭人稱爲文章宿  
老設館授徒門業極盛培植弟歲貢余澤充增貢余澤晃長君  
清季特科優貢余良駿姪邑庠余良駒一門濟濟文望卓著洵  
難兄難弟有是父乃有是子著有青氍草二卷

吳開鼎字紀堂增貢生試用訓導性好吟詠與邑中諸名宿流連

## 古田縣志

卷之二八

文苑傳

十五

詩酒著有藏拙軒詩稿一卷

林炳先字誠菴清光緒戊子舉人博通經史嫻熟典故文藝詞賦  
均擅作家掌教奎光書院歷有年所培植士類甚多雖自己敦  
崇禮法而與人晉接悉表謙和前菜匪滋事秦府尊炳直蒞古  
督辦斯案多就商於炳先及徐紳應麒故辦理得當後炳先晉  
京截取知縣分發廣東時秦爲廣東提督聘居幕僚甚器重之  
光復後回里年近七旬手不釋卷好折枝吟與蘿社諸詩侶擊  
鉢摩箋常達旦無倦容著述頗富

林時中原名耀先字和菴炳先弟天資優美篤于學弱冠取縣試  
案首入泮連登賢書寓居省會正誼致用各書院月考輒占優

等文名大噪嘗掌教奎光書院後晉京截取選授四川南江縣知縣在任未數年民國光復卸篆歸卒於京師

盧建祺字壽庭優行廩貢天資聰敏貧而好學嘗借人藏書抄錄盈篋弱冠游庠食廩餼所爲文尙典雅尤長駢體與閩清林清照閩縣邱聿徵兩太史相友善輒以文字往還著有不匱錄梅對樓詩集各一卷

陳藹字楚舫諸生性狷介課徒講學教授極嚴舉人李鑒唐諸生張壽銘等皆出其門編輯古田鄉土志

余良駿字肖翼清季特科優貢家學世濟遐邇共欽書法尤工六朝隸體充上杭縣科長代理知事任修志局總纂稿將成適粵

## 古田縣志

卷之二八

文苑傳

十六

軍過境志局失火燬十之七八致不能葺事精醫學凡親友遇有疑難病症一經診治無不立效

林榮桐字碧軒清光緒季年特科拔貢幼與姪維周同硯師教棊嚴年十六補弟子員周亦弱冠游庠俱成文名科舉罷後足不出戶日以詩酒自娛自號孤山道人曾任修志局分纂妻故後誓不再娶爲營窀穸映園題詞傳誦一時